

Hoz es il Di mundial dal teater



Il Di mundial dal teater

Hast eir fingià dudi la frasa: «Schmetta da far teater!»? Forsa cha teis genituors o tia magistra han dit quai, cur cha tü hast fat da quai chi nu's sturess far ... Per exaimpel cur cha tü hast fat il clown! Ils 27 da marz hast üna buna s-chüsa per far teater sco cha tü voust. Tü poust dir: «Bain, hoz fetscha teater! Ils 27 da marz es nempe il Di mundial dal teater.» Quist di mundial daja daspö il 1961, daspö cha l'institut da teater internaziunal til ha proclamà. Cun teater es manià quia il gö da rollas, dimena personas chi giouvan otras personas per raquintar ün'istorgia sün ün palc. Quista fuorma da divertimaint daja fingià daspö millis dad ons. Ils Grecs han fingià giovà cumedgias


e tragedias. Cumedgias sun tocs divertents, tragedias percunter sun istorgias tristas chi finischan mala maing. Ils acturs portaivan mascras per giovar las differentas rollas. Ün dals plü renomnats auturs da teater es stat William Shakespeare. El ha scrit per exaimpel il teater «Romeo e Giulia», l'istorgia da duos innamorats chi nu das-chan gnir insembel, perquai cha lur famiglias han dispitta. Shakespeare ha scrit il toc avant plü co 400 ons ed il tema sco eir il teater sun amo adüna actuals. Teater para dimena da fascinar ils umans, listess cura ed ingio sün quist muond.

Hast tü fingià üna jada guardà ün teater?

Daja als 27 da marz ün teater per uffants in tia regiun? Tschercha i'l internet e va a til verer.

Che teaters hast jent? Teaters cun poppas, cun mascras o cun drettas personas?

Giouvast tü svest jent a teater?





Giovain a teater!

1

Applaus

La grupp d'uffants sezza giò per terra e guarda vers l'üschen o vers la tenda. Ün uffant aintra o vain davant la tenda. Ella o el aintra tuot normal, cun ün nas cotschen o cun üna mascra. La grupp d'uffants (il public) applaudischa. Davo cha'ls uffants han applaudi, fa l'uffant üna reverenza/ün inclin e sezza dasper tschels uffants. Ün oter uffant aintra cun o sainza requisit e la grupp applaudischa. Uschea vaja inavant, fin cha mincha uffant ha pudü gioldair l'applaus e s'inclinar.




Pantomima

Ün uffant tscherna üna bescha o üna chosa e preschainta la rolla sainza discuorrer o far rumors. Tschels ston ingiavinar che chi'd es manià.

Eir pussibel: far pantomimas da mansters.





Rudè d'emoziuns

La gruppà sta in ün rudè. Ün uffant dà intuorn ün'emoziun. Minch'uffant dà inavant quell'emoziun a la vashina o al vaschin. Uschè vaja üna jada intuorn, fin cha l'emoziun riva darcheu pro l'uffant chi ha cumanzà. Uossa vain il prossem uffant landervia. Variantas per muossar l'emoziun: ün'exclamaziun, muossar l'emoziun be culla mimica, cun movimaints, sco las bes-chas, liun = curaschus, chan = cuntaint, gial = superbi, mür = tmücha, etc.

Leger la gazetta


Ün uffant sta dad üna vart da la stanza, culla rain vers la gruppà, e legia la gazetta. Il rest da la gruppà es da tschella vart da la stanza e tscherna ün'emoziun (o üna bes-cha). In quell'emoziun cumainzna uossa a's mouver plan vers l'uffant chi legia la gazetta. Quel as volva e la gruppà sta salda subit (freeze). Scha l'uffant culla gazetta ingiavina da che emoziun chi's tratta, vain müdà rolla, uschigliö legia'l amo üna jada la gazetta e la gruppà s'avicina darcheu.


Chi sun eu?

Our d'üna chaista cun büschmainta, requisits e mascras per as travestir piglia ün uffant trais robas e tillas tira aint. Ella o el as preschainta davant la grupp d'uffants e giouva üna persuna o üna bes-cha obain üna figüra our dad ün'istorgia o ün film. Ils uffants ston ingiavinar la rolla da l'uffant. Chi chi ingiavina güst, as das-cha travestir sco prosma o prossem.

Mascras

Zambriai mascras da differentas bes-chas our da plats da chartun e giovai co cha quistas bes-chas festageschan insembel.





Aint il restorant

Giovai üna scena i'l restorant. Ün uffant es il giast, ün oter servischa, ün terz es il cuschinunz o la cuschinunza o alch oter. Inventai amo daplüssas rollas e giovai las differentas variantas:

- Il giast posta spaghets, ma survain ün pesch ...
- La cuschinunza ha ün'assistenta o ün assistent chi metta sal impè da zücher illa crema da vaniglia ...
- La camariera mangia sves nov chicken nuggets ed il giast survain be plü ün chicken nugget ...
- Inventai aignas scenas!